

Kreativ muss merr soi

Vor e paar Daach hawwe merr uns omm Moo getroffe unn wolde e bissie uffem Domm laafe. Hinnerm Bootshaus sinn merr steh gebliwwe unn hawwe uff dess Aldehaus mett dene Antennemaste uffem Dach geguckt.

Kerle, Kerle, hott de Karl sich uffgereecht, dess iss joo wie enn kloone Wald doo owwe. Sinn die dann bekloppt, die Dinger mache doch gonz gefährliche Strahle! Merr heert doch jeden Daach, dasses Leit gibt, die sich doodegeeche wehrn. Was denke die sich eichentlich, die Mobilfuncker? Moone die, die dess baue unn die, die dess zulosse, dass mett dene alde Leit doo unne merr sowas mache kennt, weil die nor noch e paar Jahr ze lewe hädde?

De Schorsch hott gegrinst. Karl, dess iss gonz onnerst. Die alde Leit wernn getest, wie longse die Strahle aushalle unn obse nit sogar länger lewe als die, die weit weg von so Funkantenne wohne. Weil merr in e paar Johnn saache will: Was wolder dann, guckt emol nooch Flerschem, doo sinn fünfunnzwonzisch Antenne uff emm Haus ferr Seniorn unn die Leit doo droi sinn all gonz normal mett iwver Hunnert onn Altersschwäch gestorwe. Unn dann wolle die Funcker ihr Mobilmaste iwverall in de Stadt uffstelle, dann dete mir all länger lewe.

De Karl war gonz narrisch. Ei wenn dess so iss mett dene Strahle, dann habb ich noch e onner Idee. Unn zwar mett unserm Kerchegickel, der sich joo schunn long nimmi drehe dut unn nor nooch Wesde guckt. Mir hottemol ooner verzählt, dass enn Fronkforder Immobiliemakler bei Nacht unn Newwel de Messner Reinhold uff de Torm enuffgeschickt hätt um de Gickel festzeschweiße. Weil immer wenn ooner in Flerschem e Haus odder e Wohnung kaafe wollt unn wisst, dass bei Ostwind so enn Krach von dene Fluchzeuche iss, det dem der Makler saache: Das ist nur vorübergehend, schauen Sie nur den Wetterhahn, der zeigt uns an, dass morgen wie immer hier nur Westwind herrscht. Wenn dann die Leit irchendwonn emol merke, dass unsern Gickel immer in die selb Richtung guckt, dann isses zu spät, dann hawwe se de Vertraach schunn unnerschriwwe. Moi Idee iss ...

De Schorsch hotten unnerbroche: Karl, dess mettem Messner iss gut, awwer ich glaab dass de Kerchegickel verrost iss unn sich deshalb nimmi drehe dut. Awwer der kann dann aach so verroste, dass erunnerfällt, odder? Awwer wer sollen die Reparatur bezahle? Was glaabt ihr was so e Gerüst kost, um doo ennuff ze krabbele unn ...

De Karl hotten nit ausredde losse. Dess iss joo moi Idee, merr muss sich enn Sponsor suche, saache merr mol die Telekom. Merr muss halt kreativ soi. Also de Gickel kennt merr als Antenn ferr so e Händy-Station ausriste, unn weil der so hoch owwe iss kann der de gonze Unnermoo iwverdecke. Ferr so e Antenn bräucht merr noch nit emol Strom, weil den konnte Solarzelle erzeuche, die dem Gickel hinne uff de Schwonz geklebt wernn. Was halder dann doodefoo?

Jetzt war de Schorsch Feier unn Flomm. Dess gefällt merr, Karl. Weil wenn die Kerch schunn nit vill Geld hott, musse werklich kreativ soi. So kennt merr zum Beispill dess Flachdach von de Josepps-Kerch mett Solarzelle bedecke unn kennt Strom mache, der gut Geld bringe det.

Doo musst joo aach ich moin Senf dezu gewwe. Ja, kreativ muss merr heitzedaach soi, weil uff de onner Seit, wennse nix mette Sunn uff de Joseppskerch mache, werdd dort bald de Mond ufftauche, besser gesacht, de Halbmond. Eiern Honnes